



菩薩廣大因行

歸信

讚佛德

如來妙色身，世間無與等，無比不思議，是故今敬禮。

如來色無盡，智慧亦復然，一切法常住，是故我歸依。

降伏心過惡。及與身四種，已到難伏地，是故禮法王。

知一切爾焰，智慧身自在，攝持一切法，是故今敬禮。

敬禮過稱量，敬禮無譬類，敬禮無邊法，敬禮難思議。

求攝受

哀愍覆護我，令法種增長，此世及後生，願佛常攝受。

我久安立汝，前世已開覺，今復攝受汝，未來生亦然。

我已作功德，現在及餘世，如是眾善本，惟願見攝受！爾時，勝鬘及諸眷屬頭面禮佛。

行願

蒙授記

勝鬘得記

佛於眾中即為授記：汝歎如來真實功德，以此善根，當於無量阿僧祇劫，天人之中，為自在王，一切生處，常得見我，現前讚歎，如今無異。當復供養無量阿僧祇佛，過二萬阿僧祇劫。

記因

授果

當得作佛，號普光如來應正遍知；彼佛國土無諸惡趣、老、病、衰、惱不適意苦，亦無不善惡業道名。彼國眾生，色力壽命，五欲眾具，皆悉快樂，勝於他化自在諸天。彼諸眾生，純一大乘，諸有修習善根眾生，皆集於彼。

大眾得記

勝鬘夫人得受記時，無量眾生諸天及人，願生彼國，世尊悉記皆當往生。